

海陽縣志卷四十一

列傳十 耆德

周成

鄭文卿

廖廣渤

謝之浩 已上明

王學

楊闡

劉淑奇

曾廣隆

劉起振

張建侯

吳廣亭 子志魁

許一松 已上 國朝

明

周成字朝美成化乙酉舉人授崑山教諭歷任翰林院博士有至

海陽縣志

卷四十一

列傳十

一

性居喪廬墓祭奠盡哀有司為立孝德百歲坊

據周志修

鄭文卿諒季子領宏治乙卯鄉薦嘗捐已貲作溝橋通津渡以便

居民鄉人至今頌之正德紀元進階中順大夫卒年八十一

據黃志修

廖廣渤字衍泉性嗜學年十五進泮食餼十七年萬歷間拔貢筮

仕荊州別駕以母老乞終養母卒服闋補判台州署天台縣事興

利除害民頌召杜居鄉好善樂施適東津隄陷渤倡修完固田廬

無淹沒之患鄉人德之推鄉飲大賓十二次五代同堂卒年八十

八 據周志修

謝之浩十歲能文弱冠入郡庠歷試二十餘科數奇不遇以詩書

訓子弟晚年邃於理學多所闡發著大易說文學庸句解年逾八

十以壽終同上

國朝

王學字學道號道肩少稟異姿過目成誦食餼膠庠試輒前茅喜清談亶亶有致舉明天啓丁卯鄉薦辛未考知縣未謁選至順治十年授廣州府三水縣教諭時當亂後文廟傾頽詳請倡修訓士以德行士風丕變年七十四告老歸越三年卒據張志修

楊闡號今鶴瀧之曾孫涉獵子史磊落不羈善書法尤喜詩壯歲棄諸生服徜徉山水吟詠無虛日後偕太史郭之奇黃奇遇游吳越江楚道齊梁入都門詩學益進修揭陽大埔二縣志歸老登榮都之龜湖卒年九十一據周志修

海陽縣志

卷四十一

列傳十

一一

劉淑奇字曰亮品行端方性孝友自幼不攻舉子業好讀古書窮奧義著格致新言卒年八十一同上

曾賡隆字洙柏幼穎敏好讀書探奇抉奧矻矻窮年髦而弗倦仿周興嗣千字文著千字對組織百家囊括萬有屬對精工搜羅宏富並自加註釋刊而行之乾隆元年以耆年

恩賚八品冠帶享壽八十有六同上

劉起振字穎之年八十八中乾隆丙辰進士選庶常予告歸

賜檢討乾隆辛未

上南巡由粵東至浙迎

駕

賜貂皮荷包等物加侍讀銜時年百有三歲及歸里卒年十四時父開隆禱乩仙卜子將來遇合仙降辭曰驂鸞駕鶴過隆津響振雲璈法曲新回首三山波上起琪花開到百年春已暗藏開隆起振四字雍正乙卯冬潮屬會試舉人將訂期北上集於郡城劉亦與焉以年耄恐子孫不願其往且虞人笑其老也乃先期赴郡寓城北姻婭宅中謂主人曰爲我覓一小艇將往嘉應蓋給之也詰朝黎明啓戶見東方五色慶雲心獨喜憶響振雲璈之句驗矣食畢登舟留家書而去先是

國初承明季之亂寇盜蠡起沿鄉擄掠少婦多藏土窖中開隆遭亂失學居鄉能守公道膂力過人康熙戊申甲寅閒縣令點充十

海陽縣志

卷四十一

列傳十

二

三都練總自捐貲募丁壯數十自隨聞警輒統丁壯往解海陽急水塔之圍救揭陽桃山都之厄其餘湯坑新墟庵埠桑浦沿海等處悉爲救援脫婦女無算如是七八年海氛始靖家計亦因日窘

至乾隆丙辰而起振成進士人謂陰德之報云

據周志采訪冊參修

張建侯居家孝友樂善好施生於前明崇禎丁丑至乾隆丙辰壽登百歲族里請旌不及待而歿越二年其孫文朗閒關走京師丐於禮部終格成例時同里進士劉起振年九十成進士選庶常爲言於同官咸歎息太史長白富察公昌齡贈以詩云嶺海爭傳百歲翁疑參黃石侶崆峒仙音正擬輝 綸閣雲馭何期返碧空賸有鄉評名未掩況符 國瑞報應隆寒泉薦處芳徽近聊託清吟

付晚鴻又品堪坊表善堪親德業依依見後人行篋書多題忍字
衡門路迴失天民孫曹雅步披雲切里黨餘光作鑑眞爲語同官
須記取采風休負嶺頭春

據周志修

吳廣亭太學生天性純篤信因果其父墓在城西數里許旦夕造
焉有時果出必取供之嬉戲墓前如舞綵狀年八十餘尚赴省試
過岐嶺六十里不事策杖行每入旅店喃喃作誦讀聲察之則陰

鷺文也子志魁恩貢亦年踰七十

據韓江聞見錄修

許一松性孝友家貧力學素業農一松讀書暇輒助其弟耕以贍
親養乾隆庚寅領鄉薦家居自娛澹於仕進嘗辟州學不就卒年

八十餘

據采訪冊修

海陽縣志

卷四十一

列傳十

四

海陽縣志卷四十一終